

Nej yuav tsum pub rau lwm tus, Vajtswv thiaj yuav pub rau nej muaj npluamias siv tsis tas. Nej muab lub luaj li cas luj rau lwm tus, Vajtswv yuav muab lub luaj li ntawd luj rau nej. (Lukas 6:38)

**Nej yeej paub hais tias, peb tus Tswv Yexus Khetos hlub peb kawg li. Txawm yog nws yog tus uas npluanuj los, nws zoo siab los ua tus uas pluag. Nws ua li ntawd twb yog nws xav pab nej, kom nej ua tau neeg npluanuj.**

Nej yuav tsum nco ntsoov hais tias, tus uas cog tsawg yeej yuav tau sau tsawg. Tus uas cog ntau yeej yuav tau sau ntau.

**Yog li ntawd nyias yuav tsum muab raws li nyias twb xub xav tseg lawm. Tsis yog yuav khuvxim lossis yus yuav yuam yus lub siab muab. Rau qhov Vajtswv yeej hlub tus uas zoo siab hlo pub rau luag.**

Tus Vajtswv uas muaj ib puas tsav yam yuav pub tej uas nej yuav tsum muaj rau nej, kom nej niajhub muaj txaus siv, thiab muaj txaus coj mus pab lwm tus. (2 Kaulithaus 8:9, 9:6-8)

## 384

### **KEV FIJ MENYUAM RAU VAJTSWV**

Muaj neeg coj lawv tej menyuam tuaj cuag Yexus kom Yexus cev tes plhws cov menyuam taubhau, thiab thov Vajtswv foom koobhmoov rau cov menyuam, tiamsis cov thwjtim cem cov neeg ntawd.

**Yexus hais tias, cia li tso cov menyuam ntawm nej los cuag kuv, tsis txhob txwv lawv rau qhov cov neeg uas Vajtswv kav lawm, lawv muaj lub siab mos siab muag ib yam li cov menyuam yaus ntawm nej ko.**

Thaum Yexus cev tes plhws cov menyuam ntawd taubhau tas, Yexus tawm qhov ntawd mus lawm. (Mathais 19:13-15)

**Thaum lub sijhawm ntawd cov thwjtim los cuag Yexus, thiab nug Yexus hais tias, cov neeg uas Vajtswv kav lawm, leejtwg yog tus uas muaj hwjchim loj dua ntais? Yexus hu ib tug menyuam yaus los sawv ntawm cov thwjtim xubntiag.**

Yexus hais tias, kuv qhia tseeb rau nej hais tias, yog nej tsis hloov nej lub siab kom zoo li ib tug menyuam yaus lub, cais Vajtswv yeej yuav tsis los kav nej lub siab. Tus uas muaj lub siab mos siab muag li tus menyuam yaus no, tus ntawd yuav tau ua tus uas muaj hwjchim loj dua ntais hauv cov neeg uas Vajtswv kav lawm.

**Tus uas saib taus ib tug neeg twg uas muaj lub siab mos siab muag li tus menyuam no, rau qhov nws ntseeg kuv, tus ntawd saib taus kuv.**

Yog leejtwg ua rau tus neeg ntseeg kuv uas muaj lub siab mos siab muag li cov menyuam no yuamkev ua txhaum, cais cia li muab hlua khi ib txhib zeb dai rau tus ntawd cajdab, cab mus pov rau hauv hiavtxwv yuav zoo dua li cia nws ua neej nyob.